


01 novambra 2025 Fankalazana ireo olomasina



Ry Kristianina havana, amin'izao voalohan'ny volana novambra izao no ankalazan'ny Eglizy amin'ny fomba manetriketrika ireo olomasina rehetra. Ny antony dia tsotra ihany satria tsy izay voasoratra ao amin'ny kalandrie mahazatra antsika ihany no olomasina fa izay miombona amin'Andriamanitra nandritra ny fiainany ka izay niainany teto ihany koa no iainany any ankoatra ka miombom-piainana miaraka amin'ny anjely midera an'Andriamanitra ireo havantsika olomasina sady reharethantsika satria tody soa aman-tsara any izy no sady

voninahitr'Andriamanitra. Izany tokoa no anton'ireny fankalazana ireny, ny fankalazana ny olomasina dia ny fankalazana ny voninahitr'Andriamanitra satria ireo olomasina ireo dia tsy hoe izy ireo no mendrika fa nandray an'Andriamanitra izy ireo, nantsoin'Andriamanitra

Vakiteny I : Apôk. 7, 2-4. 9-14
Tononkira : Salamo 23
Vakiteny II : 1 Jo. 3, 1-3
Evanjely : Mt. 5, 1-12a

hiombona aminy ka nomen'Andriamanitra fahasoavana manokana ho fanehoana ny voninahiny satria ny antony voalohany indrindra ny fiainan'olomasina dia fanomezam-boninahitra Andriamanitra. Masina tokoa izay miombona amin'Andriamanitra

Ny faharoa dia manambara amintsika fa ohatra velona ho antsika izy ireo fa afaka niaina niaraka tamin'i Kristy tamin'ny fiainany ka tafiditra amin'ny voninahiny. Modely ho antsika izy ireo eo amin'ny ezaka ataontsika amin'ny fiombonana amin'Andriamanitra na dia samy manana ny fomba ivelomana an'izany aza ny tsirairay.

Ny fahatelo araka ny tonom-bavaka atao “Ry Andriamanitra Rainay ô, nomenao anay ity andro ity hanomezana voninahitra ny olomasina rehetra tsy tambo isaina mivavaka ho anay ka hahazoanay ny famindram-ponao. Sambatra isika fa manana mpivavaka. Izany hoe manampy antsika izy ireo mba hahatonga antsika hampibihagna ny tamiagnan’ny fiainantsika, hampamoha ny varavaram-piainantsika ka mahatonga antsika manao karibo an’Andriamanitra amin’ny fiainantsika. Izany hoe ny mahatonga an’Andriamanitra ho eo anivon’ny fiainantsika sady ivon’ny fiainantsika dia isika miombona amin’Andriamanitra amin’ny ataontsika rehetra. Izay no atao hoe fahamasinana, ka mahay mampitraotra ny finoana sy ny fiainana andavanandro. Vokatry ny vavaka izany ary mahery ny vavaka ataon’ireo Olomasina Mpiara-dalana amintsika.

Ireo vakiteny arosan’ny Eglizy androany dia hanampy antsika hibanjina ny voninahitr’Andriamanitra miaraka amin’olomasina ka manomana dieny izao antsika hivelona tahaka azy ireo ka atolotry ny Evanjely amintsika ny fandaharam-piainana hahafahantsika ho tafita tahaka izy ireo, izany ilay fahasambarana valo izay norenesintsika tamin’ny Evanjely.

Ny vakiteny voalohany taratasin’i Md Joany na koa ny Apokalipsa dia maneho amintsika ny fiainan-ko avy. Tsy tambo isaina ireo olomasina any an-danitra any ka samy tretrika tokoa ireo olomasina ireo araky ny tononkira fanaontsika, sambatra sy tretrika izy ireo, izany no lazain’ny vakiteny voalohany. “Efatra arivo sy efatra alina sy iray hetsy” izay tandindon’ny isa roa ambin’ny folo ampiana arivo ka mameno izay isa izay efatra arivo, tsy izay no isa fa tandindon’ny hafenoana, tonga any daholo ny vahoakan’Andriamanitra izay miombona amin’Andriamanitra ka manao vavaka sy fiderana ary fisaorana izy ireo. Manao akanjo fotsy ary mihoby an’Andriamanitra miaraka amin’ny anjely, izay no miandry antsika raha miombonam-piainana amin’Andriamanitra isika. Tsy noho ny fahamendrehantsika fa noho ny fitiavan’Andriamanitra.

Antitranterin’i Md Joany ao amin’ny vakiteny faharoa izay manambara fa lehibe tokoa ny fitiavan’Andriamanitra antsika ary dia miantso antsika miombona aminy Andriamanitra, miantso antsika ho zanany izy ary dia zanany tokoa isika. “Ry hava-malala, zanak’Andriamanitra isika ankehitriny, nefa mbola tsy naseho izay ho tena toetrantsika; fa amin’ny andro hampisehoana izany, dia fantatsika fa hanahaka Azy isika, satria hahita Azy araka ny tena toetrany.” Noharian’Andriamanitra mitovy endrika aminy isika, ho tanteraka izany ao amin’ny fiainana mandrakizay ao amin’Andriamanitra satria miombona tanteraka aminy isika, izany no dikany masina dia ny miombona amin’Andriamanitra, ilay toetra nananantsika hatramin’ny voalohany noharian’Andriamanitra antsika dia ho tanteraka rehefa tonga any amin’ny fiainana mandrakizay isika.

Raha te-hahazo ny hasambarana isika dia hambaran’i Jesoa ao amin’ny Evanjely ny lâlana mankany amin’ny hasambarana, io no fakafakain’ny Papa François amin’ny taratasiny miantso amin’ny fahamasinana. Antsoin’Andriamanitra amin’ny fahamasinany isika, ireo

toetra ao amin'i Jesoa ao amin'ny hasambarana valo no làlana izorantsika mankany amin'ny hasambarana izany.

Inona ary ireo hasambarana ambaran'ny Evanjely ? tsy valo fa mamintina azy ny hasambarana fahasivy dia ny hoe sambatra ianareo raha tevatevaina sy enjehina ary ampangaina lainga noho ny amiko, mifalia sy miravoa ianareo fa lehibe ny valisoanareo any an-danitra.

Io no fahasivy izay mamintina ny hasambarana valo voalaza. Lazain'i Jesoa sy atolony antsika ny làlan-kombana, toro-làlana no omeny hahafahantsika ho today any amin'ilay hasambarana voalazantsika teo. Voalaza matetika amin'ny fiheveran'izao tontolo izao satria tsy araky ny hevitr'izao tontolo izao ny hasambarana voalazan'i Jesoa mitondra antsika amin'ny fiainana mandrakizay, ny izao tontolo izao dia mifara amin'izao tontolo izao, tian'ny Eglizy asongadina izany androany, ny hasambaran'izao tontolo izao dia mandalo miserana, mihelina avokoa, mandalo izao hasambarana ka mamitaka antsika ireny rendrarena ireny, ny hasambaran'izao tontolo izao dia hasambarana fananana, ny hasambarana torin'i Jesoa dia ny toetrantsika izay iezahantsika hananantsika ny endrika maha zanak'Andriamanitra antsika, io toetra io no hiezahantsika, marina fa mifanohitra amin'izao tontolo izao izay toetra manilikilika ny olona, fa kosa ny toetra tahaka ireo olontsambatra Victoire, Lucien, Rafiringa nanana izay toetra maha zanak'Andriamanitra izany ka izy ireo no lasa olomasina araky ny toetra niainany teto an-tany miaraka mitoetra amin'i Jesoa. Ataoko fa mazava amintsika ny antony nanampian'i Jesoa ny hasambarana faha-9 izay mamintina ho antsika satria tsy mifanaraka amin'ny fisainan'izao tontolo izao ny hasambarana asehoan'ireo mpanara-dia an'i Jesoa ka mahatonga an'izao tontolo izao hanenjika azy ireo. Vavolombelona izy ireo izany hoe Martiry maneho ny tena fiainana... Mila Vavolombelona izao androntsika izao izay efa tena very repère fa indrindra ny tanora.... Ndeha ho jerentsika àry ireo torolalana omen'i Jesoa.

Sambatra ny mahantra am-panahy fa azy ny fanjakan'Andriamanitra, lazain'i Jesoa eto fa raha nanome tsodrano ireo ankizy izy satria ireo tsy mirehareha na mipoerapoera fa mahatoky an'Andriamanitra, mahatoky ka manana ny toetra mahazanak'Andriamanitra isika mitoky aminy ka izy hameno izay tsy ampy dia ny Fanjakan'Andriamanitra izay tena harena satria ny fanjakan'Andriamanitra dia i Jesoa ilay hany harena tsy miova omaly anio ary mandrakizay....

Sambatra ny malemy fanahy fa handova ny tany izy, tsy manao herisetra fa manana fanetren-tena, manana fitiavana manokana izany ka tia ny hafa, tsy manapotika ary dia fantantsika izany fa mandova ny tany. Hitantsika ireo fanapotehana vokatry ny herisetra, raha tiantsika ny ho sambatra dieny izao dia halemy fanahy isika ka hanaja ny tontolo iainantsika. Anio tokoa ny ho avy fa tsy rahampitso ka karakaraintsika an-kalemam-panahy ny tontolo iainantsika hahatonga antsika hanaja ny tontolom-piainantsika. Io no tanjon'izao

Sinaody faha-7 fijanonana faha-3. Raha malemy fanahy isika dia afaka hifampitsimbina, hifanasoa hikatsaka ny soa iombonana ka handova ny tany ...

Sambatra izay mitomany fa halana alahelo, sambatra izay mikatsaka ny mpanafaka alahelo ary tokana ny mpanafaka alahelo dia Andriamanitra Ray be famindram-po ka matoky an'Andriamanitra, tahaka ny lazain'i Jesoa ireo zaza nomeny tsodrano.

Sambatra izay noana sy mangetaheta ny fahamarinana, ny marina no maha olona afaka antsika, izay manao no marina no mendrika, ary izany no hahazoantsika fahendrena, ny fahendrena dia i Jesoa Kristy.

Sambatra ny mamindra fo fa hamindrana fo izy, lazain'ny Papa François matetika tsy hisy ny fandriam-pahalemana sy ny fihavanana marina raha tsy misy ny famindram-po sy ny famelan-keloka, raha te ho sambatra isika sy hahazo ny fiadanana marina dia aoka ho vonona mamindra fo amin'ny manodidina antsika.

Sambatra ny madio fo hahita an'Andriamanitra izy, io ilay toetran'i Masina Maria sy toetran'ny zazakely miombona tanteraka amin'Andriamanitra, io no voalazantsika tamin'ny famakafakana ny taratasy nosoratin'i Md Joany.

Sambatra ny tia fihavanana fa antsoina hoe zanak'Andriamanitra izy satria ny fihavanana marina torin'i Jesoa ka nanolorany ny ainy teo amin'ny hazo fijaliana dia tsy misy fihatsaram-belatsihy, raha izany fihavanana izany no iainantsika dia ilay tena fihavanana mampiombona fa tsy ny fihavanana atero ka alao. Ny fihavanana ambaran'i Kristy no tena izy. Io no itovizantsika endrika amin'Andriamanitra ilay noharian'Andriamanitra antsika. Fihavanana sady kristianina no malagasy no manasitrana an'izao tontolo izao.

Sambatra ny miaritra ny fanenjehana noho ny marina fa azy ireo ny fanjakan'Andriamanitra, ny fanaovana ny marina no mampiombona antsika amin'Andriamanitra ka noho izany mitondra antsika amin'ny fahasambarana maha zanak'Andriamanitra.

Ry Jesoa ô ambaranao anay ireo toetra tsara hanananay mba hahazoanay ny hasambarana, mankasitraka anao izahay ry Jesoa noho izany fahasoavana nomenao anay amin'ny alalan'ireo vavak'ireo olomasina izay manambara fa ao aminao ihany no tsy maintsy hiafaranay raha miombona tanteraka aminao izahay araky ny voalazan'i Md Augustin, tsy tony ny voninahitra raha tsy ao aminao. Noharianao hitovy endrika aminao izahay ka ampianaro izahay ho tena taranaka manorina tokoa, manorina Eglizy Tranon'Andriamanitra sy Eglizy Olona Velona ka amin'izay ho tody soa aman-tsara any an-danitra mankalaza sy midera an'Andriamanitra miaraka amin'ireo olomasina. Amen